

## **Ajoqusernermik kingunerlutsitsineq pillugu apeqquteqaat aallaavigalugu oqallisissiatut siunnersuut**

(Inatsisartunut ilaasortaq Najaaraq Møller, Siumut)

### **Akissuteqaat**

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Inatsisartunut ilaasortap Najaaraq Møller, Siumut, sammisaq una pillugu oqallittoqarnissaanut aallarniineranut qujanaq. Sammisaq imaannaanngitsuummat ajornartorsiutinullu arlalinnut kalluaasuummat oqallinnissaq pingaarutilerujussuuvoq.

*Allapputit: Meeqqat amerlaqisut ajoqusertoqarsimaneranik kingunerlutsitsisut arlaqarput, taakku qanoq atuarfeqarfinni, kommuneni inuiaqatigiinnilu pitsaasumik kivissinnaavagut?*

Meeqqat inuusuttullu amerlavallaarujussuuartut tarnikkut atugarliornermik takussutissaqartut nalunngilarput. Oqarasuaatikkut siunnersuisarfimmi Tusaannga-mi imminut toquttarneq pillugu oqaloqatiginnittarnerit amerlassusiinit tamanna ilaatigut takusinnaavarput. 2022-miinnaq oqaloqatiginninnerit 414-iusimapput.

Ullormi 10. septembarimi nunarsuaq tamakkerlugu imminut toquttarnermik pinaveersaartitsinermit ulloritinneqartumi Naalakkersuisut Qamani - Imminut toqunnissamik pinaveersaartitsineq pillugu periusissiaq saqqummersippaat. Periusissiaq taanna inuusuttunit ilusilersorneqarpoq. MIO-p nalunaarusiaanit Qamani - Inuusuttut Nunatsinni Imminut Toquttarnermut Pinaveersaartitsinissamik Innersuussutaat-nit inuusuttut oqariartuutaat periusissiamut ilanngunneqarsimapput. Oqartussa qarfiit kalluarneqartut tamaasa, soorlu assersuutigalugu Namminersorlutik Oqartussat, kommunit, atuarfiit, politiit innuttaasullu allanngueqataallutillu imminut toquttarnermik pinaveersaartitseqataasinnaaniassammata, periusissiaq sinaakkutinik patajaallisitsillunilu atortussanik tunisinikkut ilapittuuteqassaaq. Anguniakkat ilaannit aalajangersimasoq ataaseq ima oqaasertaqarpoq: *'Ilinniartitsisut tamarmik, perorsaanikkut sulisut isumassuisartullu allat meeqqanik inuusuttunillu attaveqartartut, meeqqat atuarfiini inuusuttullu ilinniarfiini atugarliuutitik nassaarniarsinnaapput.'*

Iliuserisassat suliniutillu arlaqarput, periusissiarlu Qamani ilaraat, periusissiami meeqqat inuusuttullu timikkut tarnikkullu atugarliuutaannik piutitsiunnaarnissaq siunertarinearpoq. Maannakkorpiaq innuttaasunut tarnimikkut atugarliortunut neqeroorutit immikkut ittut arlallit Nuna Tamakkerlugu Tarnikkut Piginnaanngorsaavimmut Siunnersuisarfimmullu ataatsimoortussanngortinniarlugit sulissuteqartoqarpoq. Neqeroorutit immikkut ittut saniatigut, innuttaasut tarnimikkut ilungersuutitik, ajornartoornitik imaluunniit allat, neqeroorutinit allanit isumagineqarsinnaasunngorlugit matussuserneqarsimanngitsut, ikiorneqarnissamik ullumikkut sumiiffinnut saaffissaqanngitsut sullissivimmut isersinnaanissaannut atuuffittut siunertaqarpoq. Oqarasuaatikkut siunnersuisarfik Tusaannga sullissivimmi ilaatigut inissaqassaaq.

Qaammatip oktobarip naanerani, meeqqat sakkortuumik misigisaqarsimasut pillugit qanorlu ikiorlugillu katsorsarsinnaanerivut pillugit Isumaginninnermut Aqutsisoqarfik ulluni sisamani isumasioqatigiissitsivoq. Sulianik suliarinnittartut, atuarfinni siunnersortit, tarnikkut

napparsimasunik katsorsaasut suliamillu ilisimasallit attuumassutillit allat meeqqanik inuusuttunillu sullissisut isumasioqatigiinnermi peqataapput. Meeqqat sakkortuumik misigisaqarsimasut qulaajaaffiginissaasa pingaaruteqassusaa naqissuserneqarpoq. Katsorsaaneq qulaajaanerlu eqqarsaatigalugit isumasioqatigiinnermi peqataasut suliniummik patajaallisitsinissaannut piareersarneqarput.

Taamatut oqaaseqarlunga pissarsiffiusussamik pitsaasumillu oqallittoqarnissaanut Naalackersuisut qilanaarput.